

GOOJ VEURNEUMES

Iech had miech dit jaor veurgenome neet mie te beriechte euver de Keersmes, umtot geer oondertösse allemaol wèt tot in d'n adventtied constant gevreigel is euver boe, wie en wienie 't kinneke 't levensleech maag zien. Noe stoon dao get dinger op stapel (die euvereges noch geheim zien) boe iech neet umheen kin, en dus, bin iech aon miechzelf en aon uuch, verpliech um toch mer weer dit blaank pepier vol te kretse.

Alleriers zalt geer uuch aofvraoge wee of wat mien informatiebron is. Welk stök oonverlaot heet weer ins ziene bavvie ope getrokke, boedoor de hiemelse integriteit in diskrediet weurt gebrach. Iech herhaal: Welk stök vrete heet 't in ziene kop gehaold zelfs de advocaote vaan 't hiemelriek (derde deur links achter slivenier ziene troen) zoe'n blamaasj te bezörge. Op die vraog nao wee deen informant daan wel is, kin iech uuch allein zègke tot iech uuch dao neet vaan in kinnes zal stèlle. Wie ein of aandere awwe Mestrechteneer oets in de gemeinteraod zag: e geheim is e geheim zoelang es 't geheim bleif, en dao hove veer neet geheimzinneg euver te doen, want hei zitte al genòg raodsels...eh...raodslede um miech heen. En dee jong had geliek. Wat iech uuch wel kin verraaje is tot zoewel Sinterklaos, 't Keerskinneke en de viering vaan Carneval raakvlakke höbbe. En die raakvlakke mooste neet oetvlakke, want dao is 't boe de sjoon vringk, 't kribbeke kraak en 't mooswief waankelt.

Laote veer beginne bij Sinterklaos. Geer wèt netuurlek tot heer in d'n hiemel alle kinder vertegenwoordeg; heer is um zoe te zègke de kinderombudsmaan in 't heinaomaols. Noe kin dee gooje mins noch 'nne hiele hoop zelf. Heer hèlt dat allemaol ouch in e strak sjema bij. Zoe is heer korts nog nao d'n hiemelse manèsj gewees veur 'nen opfriscurus: Peerdrije Veur Bejaorde Ierste Categorie (getuigkajee PVBIC). E stèl ingel-batjakkers had tösse de zaol en de rögk vaan 't peerd zoe'n aw gummi beddekroek verstop. Dus eeders kier es Nikkela ziene hèllege brokebojem in de zaol leet valle, waor 't of heer te vööl ertesop gegete had. Noe is dat nog tot dao aon touw, meh de ierste vreigelerije euver Keersmes woorte daodoor daoneg versteurd. Geer moot naomelek wete, tot de drei keuninge opdrach hadde gekrege um ziech in 't geheim bezig te hawwe mèt d'n ierste aanzat veur 't hoegfees vaan Keersmes 2016. (2015 zouw kwatsj zien, want dat is al veurbij). Um neet op te valle, hadde ze ziech es kojbojs verkleid en waore in de personeelskantien vaan de manèsj goon zitte, mèt 't smoesje tot zie dao zaote um te oefene veur de getuigkajee PVBIC. Euver d'n interkom, dee zie neet kóste oetzette umtot zie neet wiste wie dat mós, hoorte ze eederskier oonsmakeleke geluide, gehösseld mèt stèl getrappel vaan peerdepu. Dat vergadert neet lekker, en zeker neet es Balthasar vindt tot heer es zwarte (lees: aandere getinte naoste) oondervetegenwoordeg is. Iech wèl hei noe neet referere aon de oondertösse beruchte zwartepiet- discussie, meh dao liek 't netuurlek wel verrèks vööl op.

Veldeke Limburg



Umtot die keuninge keuninge zien en gein wiskundige (in sommege gesjefte weure ze ouch wel ins 'slummekes' geneump), is 't lesteg veur die jonges te begriep tot este geis stumme en de bis mèt z'n dreije, d'r altied 'n mierderheid oontsteit (veur de dudelekheid: BM tege C / BC tege M / MC tege B). Oonthèlt ziech eine vaan stumming, daan oontsteit netuurlek 'n aander situatie, meh dao gaon iech noe neet op in.

Dit alles eve terzij; vaan importantie is tot Bathasar ziech gepeerdskeuteld voelt en tot heer, um ewewieg te bringe in hun dreivöldegheid, eisde tot, of deen Europeaan (lees Melchior) of deen Aziaat (lees Caspar) vervaange zow weure door... jeh door wat of wee? Heer trok e naodinkend geziech en zag toen: Gein gestechel mie. Gezeen de wied doorgeveurde emancipatie moot Melchior plaots make veur 'n vrouw. Zie is daan weliswoer geine keuning, meh 'ne zeiker dee dao op lèt. Melchior wouw prottestere: Iech gaon in hoeger beroep! Zie verzèt woort door 't betoog vaan Balthasar in de kiem gesmaord. In Mestreech höbbe ze allewijl 'n börgemeisterse, ging heer wijer, dus ligk 't veur de hand tot 't mooswief 'n gooj kans maak; zie is jammers al jaorelaank mèt carnaval de rots in de branding, wie me dat zoe sjoen op 't Hollands zeet.

Um e vööl te laank verhaol... now jeh, geer kint 't wel. Ze höbbe Hermes (oet de Griekse mythologie) bereid gevoonde (nao tot Veolia neet wow) de kemissie euver te bringe, mèt 't verzeuk 'jao' te zègke op dit iervol aanbod. Hermes kump trök mèt 'ne kop wie 'nne ummer. "En jong, alles nao wins gegaange?" vreug Balthasar, dee zien gedachte al verwezelek zuut. "Haw miech op," zeet Hermes, "iech snap noe boerum Veolia neet wouw. Dat vrommes stèlt miech toch get eise; neet normaal!" "Enne," reageert Balthasar mèt ope moond. "Hei höbste häör eisepakkèt en vraog miech noets mie veur zoe 'n oonmeugeleke kemissie."

Eisepakkèt

1. Um gekoonkel te veurkoume wèl iech neet tösse uuch in stoon.
2. Veur 'n gooj hermenie doot geer wat iech zègk.
3. Pas nao de nachmes maag gedroonke weure, meh allein alcoholvrij.
4. Veur 't Sinterklaosfees moot eedere geneudigde 'n verklaoring vaan good gedrag kinne euverlègke (c.q. euverlag höbbe).
5. Mèt Sinterklaos kin dit jaor nog mèt consumatiebonne gewèrk weure, meh mèt Keersmes en Carneval moot alles mèt de kompoeter gebäöre.

Hei stop iech eve, meh d'r is noch vööl mie. De keuninge hadde hei neet op gerekend en woorte ein veur ein blas um de neus. Ze slaakde 'ne kreet, dee leek op 'ne door ein of aander konzilie goodgekäörde vloek, en verdwene kekendtere in d'n oosvleugel vaan d'n hiemel.

Sinterklaos heet geprottesteerd tege de consumatiebonne. Zie verweer waor tot die bonne gein ingkel verband hele mèt 't leedsje: 'Sinterklaasje bonne, bonne, bonne.'

Wie dat mèt Carneval zal goon? Kaarte verkriegbaar via www.keerskinneke.stal (zoonder inkel garrantie op wat daan ouch). Jonges iech weet 't neet! Noe verstaot geer vas boerum iech dit jaor de pen neet ter hand wèl numme.

Eurenhiemelse correspondent vaanoet Mestreech.

Pierre Hensels

dec. 2016